

ղինի որդի Կյուրիկեինը և վերջինիս եղբայր Սմբատինը, որ ապրել են 11-րդ դարում¹։

Այդպես ենթադրելու հիմք են ծառայել հետևյալ հանգամանքները.

1. Բարձրաքանդակների վրա Գուրգենը ձախ կողմում է կանգնած, որ եթե ձախից դեպի աջ հաշվելու լինենք, առաջինն է, իսկ Սմբատը, աջ կողմումն է, այսինքն երկրոր-

դը։ Ինչպե՞ս կարող էր Անիի Տիեզերակալ թագավոր Սմբատը իրենից ավելի փոքր թագավորի աջ կողմում կանգնել և նրանից հետո դասվել։

2. Սմբատ Տիեզերակալի եղբայր Գուրգենը երբեք Կյուրիկե չի կոչվել։

3. Սմբատ Տիեզերակալի և նրա եղբայր Գուրգենի բարձրաքանդակները կան Հաղբա-



Նկ. 5. Ամենափրկիչ եկեղեցին հր կողմից։

տի տաճարի վրա, որտեղ նրանք բոլորովին այլ տարազով են հանդես գալիս։ Այստեղ նրանք արարական շալմա են կրում գլխներին և հագել են արարական վերնազգեստ։

4. Կիրակոս Գանձակեցին գրում է, որ Ամենափրկիչ եկեղեցին շինել է Դավիթ Անհողինի որդի Կյուրիկեն։

Այս շորս կետերն էլ հիմք չեն կարող ծառայել այդ սխալ ենթադրության, հետևյալ պատճառներով։

Սանահնի բարձրաքանդակի մեջ Գուրգենի ձախ կողմում կանգնելը բոլորովին էլ

վարկաբեկիչ հանգամանք չէր կարող համարվել նրա եղբայր Սմբատ Տիեզերակալի համար։ Մեր մատենագրության մեջ էլ մի քանի տեղերում Գուրգենի անունը Սմբատ Տիեզերակալի անունից առաջ է հիշատակված։ Այսպես, օրինակ՝ ժամանակագիրներից մեկը գրել է, որ Սանահնի և Հաղբատի վանքերը շինել է Աշոտ թագավորի կին Խոսրովանուշը.

«Վասն արևշատութեան որդոց իւրեանց՝ Գուրգենայ, Սմբատայ և Գագկայ»²։

Սանահնի «Քոթուկի» մեջ ևս Գուրգենի

¹ Brosset, Deux historiens arméniens, Petersbourg, 1870, 51, ծանոթություն։ Ն. Ղ. Մովսեսյան, Լոռիի Կյուրիկյան թագավորներու պատմությունը, Վիեննա, 1923, էջ 32։ Մելիքսեթեկ, Վրաց աղբյուրները Հայաստանի և հայերի մասին, հատ. Ա, Երևան, 1934, էջ 210—212։

² Մանլ ժամանակագրություններ 13—18-րդ դդ., հատ. 2-րդ, Երևան, 1956, էջ 501։